



## Instrucións da Dirección Xeral de Educación, Formación Profesional e Innovación Educativa sobre o desenvolvemento dos ciclos de formación profesional básica no curso 2015-2016.

No curso académico 2014-2015 iniciouse a implantación dos ciclos formativos de formación profesional básica e no curso actual 2015-2016 púxose en marcha o segundo curso destes ciclos.

Ante as consultas xurdidas en relación a determinados aspectos no desenvolvemento dos ciclos de formación profesional básica, procede ditar as seguintes instrucións:

### **Primeira.** Realización da FCT con módulos non superados.

No artigo 9 do Decreto 107/2014, do 4 de setembro, polo que se regulan aspectos específicos da formación profesional básica das ensinanzas de formación profesional do sistema educativo en Galicia, establecése que o módulo profesional de Formación en centros de traballo responderá ao establecido con carácter xeral para o conxunto das ensinanzas de formación profesional do sistema educativo en Galicia.

No artigo 23.6 indícase que o módulo de Formación en centros de traballo, con independencia do momento en que se realice, se avaliará logo de alcanzada a avaliación positiva nos módulos profesionais asociados ás unidades de competencia do Catálogo Nacional de Cualificacións Profesionais incluídas no período de formación en centros de traballo correspondente.

Coa finalidade de facilitar a transición cara á vida activa do alumnado ou favorecer a súa continuidade no sistema educativo, o equipo docente poderá propor a realización da FCT ao alumnado con módulos non superados que non estean asociados a unidades de competencia: Comunicación e sociedade I ou II, ou Ciencias aplicadas I ou II.

Neste caso, o equipo docente asignaralle actividades de recuperación e seguimiento para os módulos non superados, con indicación expresa da data en que serán avaliados, previa á avaliación final de ciclo.

### **Segunda.** Alumnado repetidor de primeiro curso dun ciclo de formación profesional básica.

1. O artigo 22.3 da Ode do 13 de xullo de 2015 pola que se regulan as ensinanzas de formación profesional básica na Comunidade Autónoma de Galicia, así como o acceso e a admisión a estas ensinanzas, establece que o



alumnado que non cumpra os requisitos de promoción ao segundo curso deberá repetir o primeiro curso na súa totalidade.

Co fin de favorecer a inserción laboral do alumnado, mellorar a súa competencia profesional e certificar en calquera momento as unidades de competencia acreditadas mediante a superación dos módulos profesionais, tal como se recolle no artigo 58.1 do Decreto 114/2011, do 1 de xullo, polo que se establece a ordenación xeral da formación profesional do sistema educativo de Galicia, nos módulos asociados a unidade de competencia que fosen previamente superados, manterase a cualificación obtida con anterioridade, e o alumnado cursará estes módulos coa finalidade de subir a cualificación.

2. Segundo o artigo 3.4 da Orde ECD/2159/2014, do 7 de novembro, pola que se establecen validacións entre módulos profesionais de formación profesional do Sistema Educativo Español, os módulos profesionais que teñan os mesmos códigos serán considerados módulos idénticos, con independencia do ciclo ao que pertenzan, e trasladaranse as cualificacións obtidas previamente a calquera dos ciclos nos que os ditos módulos estean incluídos.

Xa que logo, no caso de alumnado que teña algún módulo avaliado positivamente por telo cursado previamente noutro ciclo de formación profesional básica, de ter idéntico código, cursará este módulo coa finalidade de subir a cualificación.

3. Non obstante, non é posible subir a cualificación no caso de alumnado que teña concedida unha validación de algún módulo por telo superado previamente noutro ciclo de formación profesional básica, posto que a validación se concede por petición da persoa interesada e, segundo o artigo 3.7 da orde ECD/2159/2014, os módulos profesionais validados cualificaranse cun 5, para os efectos de obtención da nota media.

**Terceira.** Título de graduado en ESO para alumnado que obteña o título de formación profesional básica.


A disposición transitoria única do Real decreto 1058/2015, do 20 de novembro, polo que se regulan as características das probas da avaliación final de educación primaria, establece que os alumnos e as alumnas que obteñan un título de formación profesional básica nos cursos 2015-2016 ou 2016-2017, entanto que non sexa de aplicación a avaliación prevista no artigo 44.1 da LOE, poderán obter o título de ESO, sempre que na avaliación final do ciclo formativo o equipo docente considere que teñen alcanzados os obxectivos e adquiridas as competencias da ESO.



Por tanto, o alumnado que teña superados todos os módulos profesionais dun ciclo formativo no curso 2015-2016 e, deste xeito, estea en disposición de obter un título de formación profesional básica, poderá ademais obter o título de ESO sempre que o equipo docente considere que teña alcanzados os obxectivos e adquiridas as competencias da ESO, para o cal, con carácter previo á avaliación final de ciclo, o equipo docente establecerá os criterios en relación aos obxectivos e ás competencias que se consideran adecuados para realizar a proposta de título de ESO.

Santiago de Compostela, 30 de marzo de 2016

O director xeral de Educación, Formación Profesional e Innovación Educativa.



Manuel Corredoira López

